

grando in fuora. Et zonti tutti, montar in barche soe e andar a levar el signor Marchexe a Santa Sophia alozato in cha' Foscarì, dove abita el suo ambascador, et poi condurlo a cha' Corner sul soler, dove *statim* passerà la regata di homeni, che li meleno uno precio di contadi, *videlicet* 16, 12, 4, di valuta ducati 32. *Item*, quella di le done col precio di contanti *etiam*, zoè prima . . . Poi si zosterà in barcha con precio di ducati . . . Et compito, il Marchexe e tutti, dove sarà soa ameda et sorela duchessa di Urbino, venute in questa terra, et altre donne mantoane, tra le qual madona . . . sua favorita, moglie di . . ., che *etiam* lui è qui, et monterano con quelli mantovani da conto è qui, che molti vi sono, sopra do burehii preparadi. El qual cargo ha tolto sier Zuan Pixani di sier Alvise procurator, di conzarli, et con soni e balando con le done suso si anderà per Canal grandò fino hore 22, poi veranno a cena a la Zuecha in cha' Dandolo, ch'è signor di la festa, qual si preparava per 200 persone tutto in arzenti: schalcho Ferigo barbier.

*Item*, che oltra le compagne, cadaun Compagno possi invidar una donna per uno; e fato il conto saranno da numero . . . donne.

*Item*, si fazi uno ponte sopra piate passi il Canal grandò fino a San Marco, dove voleno sopra la Piazza far uno soler grandò per il signor e donne, et uno altro per la muraria, qual fa Pelegrin dil Doxe et se li dà ducati 75, et veranno con 200 torze di 10 lire l'uno per il ponte a San Marco, e li si farà la festa, e verà la muraria fuora sopra carri, e monterà sul soler a balar; sichè a tal festa spenderanno da ducati 500 et più. *Item*, oltra li 4, feno do spendadori: sier Francesco Contarini qu. sier Alvise, et sier Giacomo Duodo di sier Zuan Alvise. El signor Zuane Cozaza è compagno, ma non spende nulla. Voleno domanandar la Piazza in Colegio; tegno la Signoria non ge la darà, per non esser solito etc.

A dì 24. La matina, la terra fo piena esser venuti 5 gripi con letere dil Zante, e a bocha l'armiraio disse l'armata turchesca di vele 200 era ussita dil Streto etc.

*Dil Zante aduncha, fo letere in la Signoria di sier Sebastian Contarini provedador, di 2 Mazo*, come il sumario e copia noterò qui avanti.

Vene sier Alvise Pixani procurator, padre dil reverendissimo cardenal Pixani, zercha la renontia fatà di l'abatia di San Griguol, qual l'abate Paruta non si contenta; et parlò per il Paruta sier Zuan Dolfin, fo Avogador. Et *multa hinc inde dicta*, sier Domenego Trivixan el cavalier procurator, sa-

vio dil Consejo, tolse adatar ditta renoneia per modo starà ben da una parte e l'altra.

Da poi disnar, fo Pregadi fato in Gran Consejo, che avanti non è stà fato; et vi fu il Principe, et fo lecto queste letere.

*Dil Zante, di 2 Mazo*; la copia noterò qui avanti.

*Di Candia, di sier Antonio Morexini duca et sier Marco Lando capitano, di 12 April.* Zercha l'armar le galie; e come era stà armate 4 galie etc. *Item*, scrive et manda uno aviso auto di l'armata turchesca da Pario, di sier Filippo Lion è li provedador, el sumario dil qual noterò qui di sopra.

*Di Budua, di sier Gabriel Zigogna, di 7 307\* Mazo*, ho notà di sopra.

*Di sier Domenego Capello provedador di l'armada, date al Zante a dì 7 Mazo.*

*Di Roma, di 17, di tutti do Oratori.* Et scriveno esser aviso da Syo, come Curtogoli con 60 vele era per ussir et andar a Zerbi in aiuto de' mori.

*Di Napoli, di Hironimo Dedo secretario, di 6.* Come l'armata yspana era a Cao Passera et pratichava acordo con Zerbi, per quanto è stà dito de li. *Item*, come quella cità di Napoli et il regno mandava uno bel presente a la Cesarea Majestà et di assa' valuta, tra il qual è numero 70 pezi di cavalli grossi et . . .

*Di Milan, di Alvise di Marin secretario.* Zercha alcuni banditi dil Stato di Milan presi a Brexa, et quelli li voriano; ha scritto a li rectori etc. *Item*, avisa coluquii auti con monsignor di Telegni, qual ha di Zenoa l'armata yspana esser stata a Zerbi, et da' mori è stà rebatuta etc.

*Di Franza, di sier Antonio Justinian dottor, orator nostro, da Paris, di 10.* Come il Re era partito per aviarli al parlamento con il re d'Ingaltera e la Rayna et Madre, et loro oratori li seguiva, e non si atende ad altro che in pani d'oro et far foze, adeo non havia potuto parlar al Re, che non atende ad altro che a metersi ben in ordine, et cussi la soa corte.

*Di Anglia, di sier Antonio Surian dottor et cavalier, orator nostro, le ultime di primo Mazo.* Come il Re certissimo a dì 27 sarà a Bologna, passato il mar, per abocharsi col re Christianissimo; nè ha valso a la Cesarea Majestà far el tutto per perlongar el tempo.

*Di Spagna, di sier Francesco Corner el cavalier, orator nostro, date a le Crugne, l'ultime a dì 28 April.* Come il montar in nave dil Re sarà